

1263-1263- OFP - Acta Capitulum Generalium Londoniis Celebrati

In nomine patris et filii et spiritus sancti. Amen.
Acta capituli generalis Londoniis celebrati
anno Domini · M° · CC° · LXIII° ·

Confirmamus has constitutiones. In capitulo de electione prioris provincialis. in principio ubi dicitur. statuimus. ut mortuo priore provinciali. vel amoto. usque ad illum locum. et sic deinceps. donec prior eiusdem provincie sit electus. et confirmatus. addatur. vel magister ordinis in predictis casibus aliter ordinaverit. Et hec habet · iii · capitula.

Item hanc. In capitulo. de domibus concedendis. ubi dicitur. super chorum et sacristiam. addatur. nec fiant in domibus nostris curiositates. et superfluitates notabiles. in sculpturis. picturis. et pavimentis. et aliis similibus. que paupertatem nostram deformant. Et hec habet · iii · capitula.

Item hanc. In capitulo de noviciis. ubi dicitur. similiter omnes fratres singulis annis. etc. usque ad illum locum. eorum dispositioni relinquendo. addatur. quicumque vero frater pecuniam. vel alia quecumque receperit. vel habuerit. vel expenderit. vel dispensari fecerit. reddat singulis annis. suis maioribus rationem. semel vel pluries. si fuerit requisitus. videlicet magister ordinis; diffinitoribus capituli generalis. prior provincialis; diffinitoribus capituli provincialis. prior conventualis; priori provinciali. vel visitatori. ceteri vero fratres; priori conventuali. Et hec habet · iii · capitula.

Item hanc. In capitulo de domibus concedendis. ubi dicitur. in principio. nec concessa ponatur. addatur. nec posita transferatur. nisi ubi dicti. etc. Et hec habet · iii · capitula.

Item hanc. In capitulo de electione prioris provincialis. post illud. includi sicut in electione magistri non oportet. addatur. si vero congregato provinciali capitulo. casu aliquo contingente. provincia priore provinciali caruerit. ad ipsum provinciale capitulum; electio pertinebit. Et hec habet · iii · capitula.

Item hanc. In capitulo de capitulo generalissimo. ubi dicitur. priores provinciales una cum fratre Iordane. mutetur in hunc modum et dicatur. cum venerabili patre fratre Iordane bone memorie magistro ordinis. Et hec habet · iii · capitula.

Approbamus has. In rubrica in cena domini. ubi dicitur. vadat conventus ad refectorium. deleatur totum usque in finem tocus rubrice. et dicatur sic. vadat conventus ad chorum iunioribus precedentibus. et collocatis ante pulpitem. ibi a sacrista preparatum candelabris et thuribulo. sicut fuerunt in capitulo collocata. sedente subdiacono cum ministris post dyaconum. in aliqua sede ibidem a sacrista preparata. dyaconus stans ante pulpitem. ceteris fratribus residentibus. prosequatur quod de sermone dominico restat. Finito autem sermone sine. tu autem. prelado signum faciente. surgant omnes. et dicente prelado versum. adiutorium nostrum. etc. subdiaconus et ministri accipiant que ad ipsos pertinent. et eo ordine quo venerunt; ad sacristiam revertantur. et postmodum collatio fiat. suo tempore. more solito. Et hec habet · ii · capitula.

Item hanc. In capitulo de sollempni celebratione capituli. ubi dicitur. deinde culpe audiantur. addatur. si qui vero sine licencia ad capitulum generale vel provinciale venerint. primo culpe eorum audiantur; et recepta penitentia; a capitulo excludantur. Et hec habet · ii · capitula.

Item hanc. In capitulo de capitulo provinciali. in fine dicatur sic. prior autem provincialis et diffinitores. in quolibet provinciali capitulo. determinent tempus. ante quod fratres ad sequens capitulum non veniant. Et hec habet · ii · capitula.

Item hanc. In capitulo de graviore culpa. ubi dicitur. ipsum possit proclamare. addatur. si quis vero de suspecta familiaritate mulieris notatus fuerit. et post admonicionem a prelado de consilio discretorum fratrum coram eisdem sibi factam se non correxerit. si sacerdos fuerit; a predicatione et confessionibus audiendis suspendatur. si clericus fuerit non sacerdos; non promoveatur ad ordines. et a predicatione suspendatur. si vero conversus; ultimum locum inter fratres conversos teneat. et nichilominus alia remedia apponantur. ut sufficienter provideatur ordinis honestati. Et hec habet · ii · capitula.

Item hanc. In capitulo de silencio. ubi dicitur. absque dispensacione. removeatur. et dicatur sic. in uno prandio aquam bibat. et in capitulo unam disciplinam coram omnibus recipiat. exceptis infirmis decumbentibus. et in hoc non dispensetur. nisi per magistrum ordinis. vel priorem provincialem. et hoc raro et ex rationabili causa. Et hec habet · ii · capitula.

Item hanc. In eodem capitulo. ubi dicitur. cum contigerit nos cum eis comedere. addatur. prior tamen provincialis uni de comedentibus secum poterit dare licenciam loquendi. Et hec habet · ii · capitula.

Item hanc. In capitulo de recipiendis. ubi dicitur. de consensu conventus. removeatur. et dicatur sic. nisi de consensu prioris. et duarum partium fratrum. qui sunt de conventu. ubi fuerit induendus. Et hec habet · ii · capitula.

Item hanc. In capitulo de ieiuniis. ubi dicitur. Andree apostoli. deleatur quod sequitur. usque in illum locum. nisi cum aliquo propter laborem. etc. et dicatur sic. quadragesimali utimur cibo. Idem dicimus in

omnibus sextis feriis observandum. nisi in eisdem sextis feriis. dies natalis domini evenerit. vel nisi cum aliquo propter laborem. etc. Et hec habet · ii · capitula.

Item. Inchoamus has. In capitulo de suffragiis. post illud. post festum beati Dyonisii est faciendum. addatur. anniversarium vero omnium sepulcorum in cimiteriis nostris. ubique fiat feria · iia · post octavas trinitatis.

Item hanc. In capitulo de capitulo cotidiano. ubi dicitur. nullus accuset de auditu. nisi dicat a quo audierit. addatur. et ille sit presens in domo.

Item hanc. In capitulo de recipiendis. ubi dicitur. ubi fuerit induendus. removeatur ubi. et dicatur. pro quo fuerit induendus.

Item hanc. In capitulo de studentibus. post illud. tres fratres tantum mittantur Parisius ad studendum de provincia. addatur. si vero aliquis fuerit in quacumque provincia proventus moribus. et sciencia. de quo sit spes probabilis. quod infra paucos annos. possit esse ydoneus ad incipiendum Parisius. per magistrum. et diffinitores generalis capituli; Parysius mitti possit.

Item hanc. In capitulo de capitulo generali. in fine post illud. ea vero que de generali capitulo dicta sunt. in vigilia pentecostes debent inchoari. addatur. tempus vero diffinitionis generalis capituli prolongetur secundum arbitrium magistri et diffinitorum. plus vel minus. secundum quod negocia ibidem terminanda requisierint.

Item hanc. Quod domus nostri ordinis. que aliter quam per ordinem translate sunt. de provincia ad provinciam; ad priorem provinciam revocentur.

Item hanc. In capitulo de domibus concedendis. post illud. nisi ubi predicti viderint expedire. addatur. quicumque vero frater aliter quam per ordinem. provinciarum divisionem procuraverit. translacionem domorum de provincia ad provinciam. promocionem ad cathedram magistralem; sit ipso facto excommunicatus. et ab omnibus actibus legitimis nostri ordinis; sit privatus.

Item. Quod fiat festum trium lectionum de beato Eduardo. et magister ordinis provideat de officio et de die.

Admonemus priores provinciales. quod quando dant alicui priori literas de absolucione sua. breve tempus in eis determinent. ultra quod; non maneat prior.

Item. Quod quando alicui fratri fit commissio a papa. non utatur ea. nisi eam prius; superiori suo ostenderit.

Item. Quod frater fratri librum non vendat carius; quam sibi constitit. Inhibemus districte. ne priores gravent fratres suos. propter accusationes quas aliquando de eis fecerint.

Item. Admonemus omnes fratres. ne per aliquas circumstancias. sive locorum. sive temporum. sive personarum. vel alias quascumque. loquantur de hiis. que in confessionibus audierunt.

Item. Caveant priores provinciales et eorum vicarii. ne impedian aliquatenus visitatores missos in capitulo provinciali. quo minus libere suum officium exequantur.

Item. Caveant diffinitores. ne aliquatenus. in excusacione. revelent aliis. qui ex eis consenserunt vel dissenserunt in aliquam sententiam; diffinitive promulgatam.

Item. Quicumque hactenus inter diffinitores constitutus. se ipsum de assensu duorum. aliis dissidentibus. predicatorem fecerit generalem; pro non predicatore habeatur. inhibemus autem districte; ne deinceps tale aliquid attemptetur.

Dicimus quod assignacio diei. quo tractari debent que ad capitulum generale. vel provinciale mittenda sunt. pertinent ad subpriorem; et ad conventum.

Item. Vicarii magistri. vel priorum provincialium; ubique teneant locum suum. nisi in capitulo. dum officium correctionis exercent.

Absolvimus priorem provinciam Theutonie. Priores conventuales de Ponte in Ybernia. etc.

Concedimus in provincia Francie · ii · domos. unam in Britannia. quam petit dux Britannie. aliam apud Gebenas.

Item. Provincie Provincie · ii ·

Item. Provincie Anglie · iiiior · et duas in Ybernia.

Ista sunt suffragia.

Pro domino papa. etc.

Capitulum sequens assignamus Parisiis in provincia Francie.

Admittimus cessionem magistri ordinis. quam humiliter a nobis petiit. ipsum ab officio magistratus absolventes.

Item. volumus quod post mortem eius fiat pro eo per totum ordinem; sicut pro magistro ordinis fieri consuevit.

Volumus etiam et ordinamus quod post primum priorem in choro et in aliis locis primum locum teneat. et ab oneribus ordinis eum eximimus. quantum ipse duxerit acceptandum.

